

Bergen, 24. april 2017

Referat frå representantskapsmøtet i Stiftinga Kystsogevøkene

Representantskapsmøtet for Stiftinga Kystsogevøkene vart halde tysdag 18. april kl 10.00-12.00 i framre salong oppe om bord i M/S *Midthordland* ved Holbergskaien i Bergen.

Tilstades:

Per Lerøy (leiar i representantskapet), Børge Haugetun (styreleiar), Kjell Magnus Økland (dagleg leiar), Bente Bondhus (Hordaland fylkeskommune), Trond Nesmann Berntsen (Askøy), Odd Bjarne Skogestad (Fjell), Astrid Aarhus Byrknes (Lindås), Øyvind Oddekalv (Meland), Kjetil Osablod Grønviig (Os), Jarle Skeidsvoll (Osterøy), Jon Askeland (Radøy), Johannes Landmark (Stord), Kari-Anne Landro (Sund), Ruth Eriksen (Sveio), Kåre Martin Kleppe (Tysnes), Atle Dævøy (Øygarden)

Fullmakter:

Os: fullmakt til Kjetil Osablod Grønviig

Det var tilstrekkeleg mange tilstade til at møtet var vedtaksfør.

Møtet opna med at maskinist Arve Haukøy orienterte litt om M/S *Midthordland* og årets sesong for båten.

Saker til handsaming

01/17 Godkjenning av innkalling

Ingen merknader til innkallinga.

02/17 Val av ein representant til å skrive under protokollen i tillegg til møteleiar og referent

Per Lerøy vart vald som møteleiar og Bente Bondhus vart vald til å signera protokollen.

03/17 Markering av avgått dagleg leiar, Lena Eikeland Kutschera

Styreleiar Børge Haugetun heldt tale der han framheldt dei mange gode kvalitetane som Lena har vist i arbeidet i over 10 år som dagleg leiar. Då ho kom inn i stillinga var det trong for ein ryddig person for å få Kystsogevøkene på rett kurs. Undervegs har ho vist imponerende evne til å halde oversyn over og kontakt med eit stort tal personar friviljuge og halde oversyn over kva arbeidsoppgåver som må gjerast til ulike tider. I hennar tid har omfanget av Kystsogevøkene vakse, både med tanke på tal kommunar som er med og talet på arrangement og publikumsoppslutning. Som symbol på Stiftinga si takksemd fekk ho blomar, takkekort signert av heile møtelyden, gåve (Islandsgenser) og gåvekort på kystkulturell aktivitet for ho og heile familien hennar, nemleg deltaking på Siglarveko på Tysnes i juli/august. Til sist takka Lena for merksemda og gav uttrykk for at det har vore ei stor glede for henne å arbeida til beste for kystkulturen.

04/17 Årsmelding 2016

Representantane hadde fått tilsendt den 24 sider lange årsmeldinga på førehand. På møtet fekk årsmeldinga rosande omtale for å vere oversiktleg og fyldig, og fleire i møtelyden gav uttrykk for at kystkulturmonstringa står for eit imponerande mangfald i aktivitetar. Nyta av felles marknadsføring vart òg framheva. Årsmeldinga er signert av alle styremedlemmane, tidlegare dagleg leiar og noverande dagleg leiar.

05/17 Årsrekneskap 2015

Rekneskapet var òg sendt ut på førehand til representantskapsmedlemmene. Årets resultat viser eit underskot på 12 882 kr. Det er prioritert hardt for å prøve å få til eit positivt resultat. Stiftinga fekk 100 000 kr mindre i tilskot til drifta enn året før. Det førre styret i Kystsogevekene arbeidde i 2015 opp mot fylkeskommunen for å redusera framlegget til kutt i driftstilskotet på 300 000 kroner, som enda med reduksjon på 100 000 kr. Det nye styret arbeidde, og lukkast, i 2016 for å få reversert dette kuttet på 100 000 kroner i redusert driftstilskot, og her gjorde særleg Beate Husa ein god innsats opp mot fylkespolitikarane i Hordaland. Også årsrekneskapen er signert av alle styremedlemmane og dagleg leiar.

Det vart stilt spørsmål frå årsmøtet om ikkje note 4 i rekneskapet kunne vore meir spesifisert.

Før møtet hadde dagleg leiar fått munnleg melding frå Collegium Revisjon om at rekneskapen var revidert og godkjend, men grunna påskeferien rakk ein ikkje å senda ut det signerte brevet med revisors rapport. Sidan revisors rapport mangla på møtet valde årsmøtet at rekneskapen skal godkjennast på epost når revisors rapport ligg føre.

Etter årsmøtet har dagleg leiar motteke signert brev frå Collegium Revisjon med revisors rapport der det vart konkludert med at stiftinga var forvalta i samsvar med lover, formål og vedtekter. Denne ligg som vedlegg til referatet og ein ber difor om at representantskapet sender tilsagn til godkjenning på epost til dagleg leiar.

06/17 Presentasjon av ny dagleg leiar, Kjell Magnus Økland

I januar byrja Kjell Magnus Økland som ny dagleg leiar for Stiftinga Kystsogevekene. Han heldt ein presentasjon om sin bakgrunn. Han er fødd og oppvaksen i ein sjømannsheim på Tysnes og har vore mykje i båt gjennom oppveksten. Dei siste 12 åra har han arbeidd med å skriva boka om Oselvaren og var òg den som skreiv nominasjonsframlegget som førte til at Oselvarverkstaden og Oselvarkulturen er komen inn på UNESCO si liste over verdas immaterielle kulturarv. Elles er han aktiv på mange frontar: kanskje særleg som regattaarrangør innan seglsporten i Ran Seilforening og Båtlaget Njord/Tysnes, men han har òg vore med og laga museumsutstillinga i Båthallen, sit i styret i Oselvarklubben, er vevmakar for Hordaland Seilkrets og er styremedlem for Hordaland Fylkeskystlag, der han er redaktør for Årebladet. Den som vil halde seg orientert om prosjekta hans kan sjå sjølv på www.kjellmag.no

Etter dette vart det servering av rundstykke og kaffi/te.

07/16 Informasjon om Offisiell opning av Kystsogevekene 2017 i Askøy

Opninga av Kystsogevekene i 2017 er lagt til Askøy kommune som har vedteke at opningsarrangementet skal gå føre seg i Strusshamn. Dagleg leiar for Strusshamn Kultursenter, Trond Nesmann Berntsen orienterte om planlegginga av årets Kystsogeopning. Strusshamn er ein stad med lang historie og ein rår over ein stor bygningsmasse som rommar mykje spanande kulturhistorie. Under opningsarrangementet vil ein freista å få til eit mylder av aktivitetar på både land og sjø som speglar kystkulturen. Det vert sett opp to veteranbåtar, *Vestgar* og

Stavenes, som går frå Bergen til Strusshamn og som plukkar opp aktørar på vegen. Arrangementet vil ha ein familievenleg profil og ei rekkje lokale kulturaktørar bidrar med ulike innslag, slik at Strusshamn vil myldra av kystkultur heile opningsdagen. Årsmøtet tykte dette høyrdest spanande ut og ser fram til årets opning av Kystsogevekene laurdag 12. august.

08/17 Vegen vidare for Kystsogevekene

Dagleg leiar Kjell Magnus Økland orienterte om kva som har skjedd sidan han byrja i jobben i januar. Då sendte styreleiar Børge Haugetun ut pressemelding om tilsetjinga av ny dagleg leiar, noko som resulterte i 9 presseoppslag. Etter det har Økland hatt møte med aktørar i 13 av dei 22 kommunane samt ein del regionale aktørar (Hordaland Seilkrets, Hordaland Sogelag, Hordaland Fylkeskystlag, Samarbeidsrådet for Sunnhordland, Veteranbåtlaget Fjordabåten). Like før påske vart det sendt ut ein liten pressemelding med notis med påminning om årets programfristar, noko som har gitt 8 oppslag i lokale media. Som forfattar av boka om Oselvaren er Økland ofte kringom som foredragshaldar og har fletta inn litt om Kystsogevekene i alle dei 15 foredraga han har halde i 2017. Vidare har han arbeidd med ei fornying av nettsida og programheftet. Det er firmaet Reine Linjer ved Arne Vidar Brekke og Øyvind Lothe som har ansvaret for dette. Årsmøtet fekk sjå skisser til både ny nettside og ny utforming av programheftet. Skissene vart godt mottekne av møtelyden.

På slutten var det sett av litt tid til litt drøfting kring vegen vidare for Kystsogevekene. Årets Kystsogeveker opnar som nemnt laurdag 12. august og varer til sundag 17. september. Programheftet skal vera klart kring til distribusjon kring 15. juni og ein vil i år bruka noko av marknadsføringsmidlane på skjermene på ferjene og hurtigbåtane i fylket. Økland er elles oppteken av å bruka båtane og gjera sjøen til arena for fleire av arrangementa. Han vonar òg at ein del av aktivitetane i skulane og musikkskulane på denne tida kan inkludrast i Kystsogevekene. Frå salen vart det elles nemnd at oppdrettsnæringa òg bør kunne koplust på Kystsogevekene.


I samråd med styret er planen at han skal vitja eit kommunestyremøte i kvar kommune dei komande to åra. Dette for å informera om kva Kystsogevekene er og for å byggja opp eit større lokalt eigarskap til samarbeidet. Som eit fyrste steg på vegen vil årets programhefte innehalda korte helsingar (ca 90-130 ord) frå ordførarane om årets lokale program. Ordførarane vil dessutan verta utfordra på å laga ei lita videohelsing der ein fortel noko om lokal kystkultur og kva ein ser fram til i årets Kystsogeveker. Økland ynskjer dessutan å få til eit større fellesmøte for aktørane kring Kystsogevekene i løpet av vinteren der ein utvekslar idear og etablerer tettare kontaktflater for aktørane i Kystsogevekene. Her er det vesentleg at både fylkeskommunale kommunale og frivillige aktørar vert involvert.

Møtet slutt 1145. Representantane var svært positive til å bruka M/S Midthordland som arena for møtet og ser fram til andre møter i regi av Kystsogevekene på andre kystkulturelle arenaer.



Per Lerøy

Leiar i representantskapet



Bente Bondhus

Hordaland Fylkeskommune



Kjell Magnus Økland

dagleg leiar

referent

Kystsoge
vekene **2017**
12. august til 17. september
www.kystsogevekene.no